

17

1614

116

3146

RÉPONSE
POVR LA ROYNE
A MONSIEVR
LE PRINCE.

8

M. DC. XIV

3146

ACC 83-1016116)

RESPONSE POVR LA *Royne à Monsieur le Prince.*



ON NEPVEV.

I'ay receu vostre lettre, par laquelle i'ay esté bien esbahie, qu'incontinent apres vous estre departy en bonne intelligence d'auec moy, vous m'avez faict vne querelle, sans que i'aye peu comprendre le subiect. Vostre lettre porte au front, ce que depuis la memoire des hommes, semblables escripts ont tousiours porté, le soing du public, & l'obeyssance au magistrat, c'est à dire, l'affection au seruice du Roy Monsieur mon fils. Ie l'ay, certes, tousiours creu ainsi: & si telle n'eust esté ma creance, ie me fusse gouvernée enuers vous tout autrement que ie n'ay faict. En quoy si i'ay esté trompée, l'euenement le demonstrera. De là vous tombez à parler de vostre absence de ce Royaume: & me semble qu'il n'estoit pas grand besoin de rafraischir la memoire d'un temps si triste que cestuy-là. Vous dictes qu'apres vostre retour vous auez conuiué & passé sous silence les desordres qu'on a veu assez frequents en ce Royaume depuis la mort du feu Roy: ce que vous auez faict pour euitier les troubles: dont il est aduenü que par la grace de Dieu, ma bonté, & vostre patience la paix a duré quatre ans. Qui empesche que vous ne continuiez ceste patience iusques à

4
la maiorité du Roy ? qui vous émeut de rompre ? nous y touchons du bout du doigt : il n'y a plus que six mois , il ne se peut rien gaster entre cy & là : voulez vous faire naufrage au port ? Quant aux desordres que vous avez veuz , ce dictes vous , si frequents en ce Royaume depuis quatre ans (car vous ne parlez pas de plus loing) ie vous prie , mon Nepueu , de m'apprendre , non pas vous , mais tous les plus vieux qui vivent encores à present , si loing que leur memoire se peut estendre au passé , quand est-ce qu'ils y ont veu de l'ordre depuis cinquante ans en ça ? quels nouveaux desordres y sont-ils suruenus durant ma regence , qui ne fussent point auparavant ? Car la continuation des desordres a plustost dormi du temps du feu Roy , que du tout cessé : Si plustost , comme vn cloud pouffell'autre , les plus grands n'ont faict oublier les moindres . Qu'ils disent quand est-ce qu'ils ont veu depuis cinquante ans que les Gouvernemens , que les places fortes (si le danger euidet & instant n'a conseillé autre chose) ont esté donnez à d'autres qu'à des favoris , & encores favoris des favoris , ou des favorites ? ou tantost pour de l'argent , ou tantost pour autres causes que la honte me deffend de dire : sans auoir esgard à la noblesse , merites ou valeur des personnes ? Quand est-ce qu'ils ont veu que les benefices ont esté conferez pour la pieté & religion ? les offices de iudicature pour la probité & suffisance ? Cela , cela n'est pas seulement effacé de vos registres , mais aussi de la memoire des hommes d'apresent . Quand est-ce que les offices militaires , voire celles de la

maison des Roys & des Roynes, & des enfans de France n'ont esté vendus? Quand est ce que l'on n'a vendu au plus offrant & dernier encherisseur la libre & arbitraire disposition des vies, des biens & de l'honneur de tous les habitans de ce Royaume, de quelque qualité qu'ils soyent? Car qui iuge les Princes, qui iuge toute la France, que ceux là qui ont le plus d'argent, pour acheter tels offices? Ils en ont usé plus modérément le passé que non pas à present; ie le confesse; & que le prix en est venu à l'infiny: car la vanité & l'ambition n'a n'y terme ny borne. Le prix varie selon le temps: l'augmentation ou diminution duquel (car cela arriue à toutes denrees) n'a pas fait l'abus, mais la vendition, le libre & non limité commerce. Le pis est que de ce temps ceste orde, sale & vilaine marchandise, cest ord & vilain traffic, a esté autorisé, afin que nous ne peussions desmentir nostre lascheté & infamie, par Edict public, Edict que ie trouue aussi mauuais que vous. Mais qu'en puis-je mais? Pourquoy reiettez-vous la faute sur moy qui n'y ay apporté que la tolerance, que le temps & la necessité ont extorquée & extorquent encore auiourd'huy de moy? Il seroit aisé à verifier qu'il n'y eut iamais moins de desordres depuis cinquante ans, que les quatre ans dont vous parlez. L'Eglise a-elle esté il y a long temps plus libre, plus assurée, & plus releuée, le seruice diuin plus religieusement célébré, le peuple mieux & plus continuellement consolé & instruit? Les benefices ont-ils esté conferez à gens plus pieux & de meilleure vie? La iustice a elle esté plus ho-

noree, respectee & obeye? Ne sçavez-vous pas bien qu'en la Pieté & Iustice consiste le gros de l'Estat? Cottez-moy vne seule ville, vne seule bourgade, vn seul chasteau, vn seul Seigneur de nom & de marque qui se soit reuolté de son debuoir: & pourquoy est-ce? c'est (comme dit Tite Liue des villes d'Italie qui estoient tousiours demeurees en l'obeissance des Romains, encores qu'elles eussent esté fort sollicitées par Annibal, qui estoit le plus fort en la campagne) pour ce qu'ils ont esté tousiours commandez d'un iuste & moderé commandement. Ce langage est plein d'enuie, ie ne le continueray point d'auantage. Ne nous attribuons point, mon Nepueu, ne nous attribuons point, ny vous, ny moy, la louange de la conseruation de la paix de ces quatre ans là. Laissions là ma bonté, ne parlons point de vostre patience, elle est assez cogneüe: attribuons cela à Dieu seul, qui a respandu dans moy sa grace, qui m'a assistee de bons & fideles conseillers, que le feu Roy Monseigneur m'a laissez: & a donné vne ferme resolution au peuple en general, qui ayant gousté la douceur de la paix, & ayant encores en la bouche l'amertume des troubles, n'a point voulu manger de la guerre. Et encor que l'humeur du peuple n'y fust nullement disposée, si n'a-il pas fallu pour cela laisser d'y prendre vne grande & assidue garde: car toute multitude, comme la mer, est de soy-mesme immobile; selon les vents qui la poussent elle est calme ou esmeüe. Il y auoit encores des chefs de parti d'une & d'autre religion, (vous les cognoissez bien, mon Nepueu)

qui ne demandoient pas mieux, qu'à mener les mains : il y auoit des mal-contens plus que d'autres. C'est vne maxime, quand en vn Estat il y a plus de telles sortes de gens qui aymēt choses nouuelles que d'autres, qu'il ne peut faillir d'y auoir du remuement, trouuans des chefs & l'occasion à propos. Les passages des Royaumes à nouveau successeur, & encores mineur, & partant foible, en fournissent assez. Mais il y a esté sagement & prudemment pourueu : on a contenté les mal-contens au moins mal, & à meilleur marché qu'on a peu : & les personnes qu'on a interessées, ce n'a pas esté à foy, comme vous dictes, mais à la paix & à l'Estat. Il n'y a rien tant petit ait-il esté, où ie n'aye distribué mon soing & ma sollicitude. I'ay tousiours ouy, & me suis esloignée de toutes choses qui eussent mené à quelque alteration du repos de ce Royaume. C'est pourquoy tout aussi tost que ie fus declarée Regente, encores qu'il me vint bien en la pensee, & à ceux qui m'assistoient de leur fidele conseil, de conuoquer les Estats, toutesfois ie subsistay. Je songeois à ce que le Renard respondit au Lion, qui luy demandoit pourquoy il ne l'estoit venu voir en sa maladie ; I'ay eu peur, dit-il, pource que i'ay veu tous les pas de ceux qui vous sont venus visiter, tirans droit vers vous, & n'en ay veu pas vn en arriere. Je voyois que ces Estats n'auoient iamais tenu, qu'il ne s'en fust ensuiuy vne guerre ciuile : que de tout ce qui y auoit esté statué & ordonné, on n'en auoit iamais rien gardé ny obserué. A quoy il auoit tenu, la memoire en faignoit encores. Je considerois que s'il y eust eu iamais lieu

de les conuoquer, c'estoit iors que le feu Roy Monseigneur vint à la couronne; & toutesfois qu'il ne l'auoit iamais fait; craignant (à mon iugement) pareils euenemens que les passez. Il eluda cela par vne assemblee qu'il fit à Roïen, pour contenter le peuple; mais ce n'estoient pas Estats. Je discourois que les sages medecins ne baillent iamais medecine au fort de l'accez, & que bien souuent ils auancent plustost la santé par laisser le patient en repos, que de l'esmouvoir. Je craignois, estrangere & Regente, (telle estoit la mere de saint Loys) de faire quelque pas de clerc: car en l'Estat, comme en la guerre, il aduiant bien souuent qu'il n'est pas permis de faillir deux fois. J'auois appris qu'en telle constitution d'affaires, où estoit le Royaume, il n'y auoit rien qui le peust sauuer & garantir des pernicieuses diuisions qui le menaçoient, que le commandement absolu de quelque personne que ce fust, qui portast creance, tant par sa qualité, que par decret public; qui ne fust reuocquée en doute: car ceste doute estoit diuision; qu'il falloit tirer à quartier & esuiter, comme le plus perilleux rocher qui fust en toute la coste. Principalement au commencement que les esprits n'estoient pas encores asseurez, & flot-toient en incertitude, & ne scauoient quel costé pancher, il ne falloit commettre qu'il fust remué aucune mention de contredict, en quelque assemblee publique que ce fust, à ce que le Parlement de Paris auoit saintement & selon le droict de nature ordonné de moy. Autrement c'estoit rompre le consentement vniuersel de tout le peuple; & ouurir le pas à la sedition. En

tels affaires la multitude des commandeurs n'est pas bonne; il n'y a que le commandement qui depend d'un seul, qui puisse guarir & arrester la confusion. Fueilletez vos histoires, vous n'en trouuerez que trop d'exemples. Les seditions aduenues sous Charles V. & Charles VI. en font foy. Car la faute qu'ils firent, fut de permettre qu'on deliberaſt trop ſouuent & trop librement de leur pouuoir. La iuſte & legitime eſlection de ma perſonné, & la prudence avec vne grande moderation dont i'ay vſé, paſſant d'extremement par deſſus toutes difficultez, & coupant chemin à la contradiction, a empesché ſemblables mal-heurs qui aduindrent lors, & beaucoup pires. Ayant pris le gouuernement du Royaume, ie me ſuis ſerui de ceux à qui le feu Roy Monſeigneur l'auoit creu & confié. I'ay coulé le temps, i'ay callé aux deſordres inuete- rez & endurcis; non pas que ie n'euisse bonne volonté de les trancher, ſi i'euisse peu. Les abus en Frances'y introduiſent facilement, mais on ne les en chaſſe que mal-ayſement, meſmement quand il y a ou des Grands, ou multitude de gens, qui y ſont intereſſez. Ils eſtoient tournez en couſtume, & de trop long temps enracinez; ie n'auois pas aſſez de puissance: ſi ie l'euisse voulu faire, i'euisse tout gaſté, & tout mis en combustion: ou ie n'en euisse rapporté autre fruit, ſinon que i'euisse faiſt paroître les maux, auxquels nous n'eſtions pas eſſez forts pour reſiſter. Ie me ſuis contentee de tenir les affaires en compromis, ſans empirement, & en reſeruer l'entiere deciſion au Roy Monſieur mon fils, quand il ſeroit majeur. Tous mes conſeils, toutes mes penſées,

toutes mes actions, n'ont iamais tendu qu'à sau-
 uer la barque, & la conduire au port de salut, c'est
 à dire, à la majorité du Roy Monsieur mon fils,
 sans hazard, sans danger, sans peril, sans tem-
 peste, sans orage, & sans naufrage; & esqui-
 uer tous escueils, tous bancs, tous rochers, pour
 rendre au Roy le vaisseau en mesme fret que ie
 l'auois pris, si en meilleur ie ne le pouuois. Dieu
 a beny & fortuné mes conseils iusques à present,
 si vous n'y apportez quelque infortune, ce que
 ie n'ay iamais attendu de vous. Toutesfois
 vous faictes paroistre par vostre lettre, que
 vous auez conceu de longue main vn grand
 mescontentement contre moy. D'où cela pro-
 uient ie ne sçay; car ie ne vous en ay point don-
 né d'occasion. Vostre lettre est toute plei-
 ne de paroles choisies, telles que la mauuai-
 se humeur, en laquelle vous estiez lors, vous
 a dictées, esquelles y a plus de vaine & affe-
 ctée resonnance, que de sens & de substance. Elle
 est toute pleine d'inuectiue contre mon admini-
 stration, contre les officiers de la Couronne,
 par l'aduis desquels le feu Roy Monseigneur
 m'a chargée de me gouverner. Vous ne par-
 ticularisez rien, vous ne nommez personne,
 vous ne circonstantiez aucune chose, ce
 sont inuectiues indefinies de choses generales,
 iettees à la traaverse pour faire trouuer mauuais
 ce que j'ay geré & administré: combien qu'en
 matiere d'accusation, il n'est pas permis de va-
 guer avec le danger de la reputation d'autrui.
 Oyez, François, oyez vn uouueau crime & au-
 parauant non ouy: La Royne Regente & ceux
 qui la conseillent ont baillé les gouuernemens

& les places fortes à personnes indignes & incapables. Qui ne sçait que le plus digne & le plus capable, c'est celuy qui a le plus d'argent? Quelle dignité, quelle capacité est requise en telle sorte de gens, sinon la profession des armes & la fidelité? Que ne dictes-vous combien il y en a vacqué? & quels? & à quelles gens on les a baillez? Les prouinces en France sont grandes & abondantes en fortes & bonnes villes, & fort peuplées: ce sont autant de Royaumes. Les Gouverneurs en chef de ces prouinces, qui sont encores auourd'huy les mesmes qui estoient du temps du feu Roy Monseigneur, sont Princes & Seigneurs puissans. Le moyen de diminuer l'excessive puissance de quelque Magistrat, qui pourroit à la longue tourner à abus, est la departir à plusieurs, & à temps. Ce dernier estoit du vivant de nos peres. Le departement est demeuré: car les Roys donnent des Lieutenans à ces Gouverneurs, mettent des Capitaines particuliers aux villes & aux places fortes de la prouince. Les Gouverneurs en chef les y veulent mettre, & les auoir à leur deuotion: de là vint tout le mal, & l'indignation contre moy & le conseil du Roy. Ne sçavez-vous pas bien que ces offices là sont venaux? Ne sçavez-vous pas bien le party de la pluspart de tous les autres? Car quant aux offices non subjects au party, il en a vacqué vn, & non plus, dont j'ay gratifié vn Gentilhomme des miens. Parlons, parlons, mon Neveu, à cœur ouuert: leuons le masque. Je suis estrangere de naissance, ie le confesse, mais de cœur & d'ame toute Françoisse; de quoy l'on ne peut douter, ayant nanty la France de si beaux &

de si précieux gages que mes enfans. Quand ie suis venue en France, i'ay amené quelques cinq ou six personnes, tant hommes que femmes, de mon pays, de mesme laiët, de mesme langue, qui ont esté tousiours nourris & par moy & avec que moy. Il n'y a homme si aliené d'humanité, ny qui ait le cœur si dur & acéré, de trouver mauvais que i'aye quelques domestiques de mon pays; que ie viue avec mes compatriotes, qui ont humé, dès qu'ils ont salué la lumiere de ce monde, le mesme air que moy. O combien est douce à chacun la souuenance de son pais! Ayant ce bon heur & cest honneur d'estre mariee à vn grand & puissant Roy, (grand de valeur, d'esprit & de courage, s'il y en eut iamais,) quelle enuie y a-il, si pour rendre ma suite plus digne & plus releuee, i'honore mes seruiteurs de quelque grade, qui moindre qui plus eminent, selon leurs qualitez : puis qu'avecque moy ils ont transferé toute leur affection, dont nature les obligeoit enuers leur pays, à cestuy-cy, & qu'ils n'en recognoissent plus d'autre ? Bref du repos vniuersel, qui sous ma protection, a continué iusques icy, vous en voulez espraindre & tirer la guerre, & ne demandez que pretexte de l'estmouuoir. Guerre, guerre helas ! ciuile, qui est pour acheuer de ruiner du tout ce pauvre & miserable (tel le puis-je bien dire) pauvre & miserable Royaume, si Dieu, ou la mauuaise fortune des François le permet. Or vous recherchez mes actions iusques à cent mille pistoles pres, comme si i'estois veufue de quelque Financier ou de quelque Comptable : recherche pleine d'indignité, tant pour moy que

pour vous : & me semblent n'auoir pas si peu mérité de cest Estat , qu'il me faille rechercher pour del'argent. Puis vous mettez encores en auant le renouuellement de certaines commissions pour faire leuées sur le peuple , où vous auez vous mesmes opiné : & pensez par ce moyen l'attirer à vous , & m'ostant de sa bien-vueillance, vous y insinuer en ma place. Mais ceux qui vous donnent ce conseil , vous trompent. Ie ne m'amuseray point à vous en dire les raisons , qui sont dedans les liures , & que l'experience a appris estre veritables. Seulement ie vous diray , qu'un seul logis de vos gensdarmes , si Dieu vous oste l'entendement iusques là , que vouliez pescher avec vn hameçon d'or , (ce que ie le prie de ne faire pas) affligeroit beaucoup plus le pauvre peupl^e que tout cela. Vous faictes vn recueil , & vne enumeration de tout ce qui s'est passé au Conseil du Roy Monsieur mon fils , voire la plus part par vostre aduis , depuis ma Regence , & y donnez le fil tel qu'il vous plaist. Vous tachez de me rendre odieuse sous le nom des officiers de la Couronne , qui scauent les secrets ressorts de l'estat , desquels ie me sers en l'administration d'iceluy. Vous remuez toute pierre , pour les tirer en enuie , à laquelle leurs charges & fonctions , où ils sont ordinairement employez , les exposent assez ; & adioustez de l'huile à la cheminee. Vous auez pris vn tel ombrage d'eux , que vous leur ietteriez volontiers le chat aux iambes. Ils ont blanchy & vieilly au seruice des Roys. Ils sont nés vos seruiteurs : il vous seroit beaucoup plus seant de les offenser que de les hayr : combien que d'offenser vous le fai-

êtes assez, & que vous ne deussiez faire ny l'un, ny l'autre. Mon Nepueu il a pleu à Dieu me choisir pour outil & instrument de sa benediction sur la France. Ceste benediction a toute residé & reside encores en ma personne. Je vous prie, representez vous deuant les yeux en vostre entendement, que c'eust esté de ce pauvre Royaume, lors que le feu Roy Monseigneur fut tué, si le bon-heur qui accompagne la France, n'eust voulu que ie m'y fusse trouuee. Il auoit laissé trois enfans massés, dont le plus âgé, qui est auourd'huy le Roy Monsieur mon fils, n'auoit que neuf ans. Vous estiez absent, l'affaire pressoit, & ne receuoit point de dilation. Et puis, quand vous y eussiez esté, il y eust eu vn beau mesnage. Vous vous fussiez volontiers bien accordé avec vos Oncles, & autres Princes & Seigneurs, tous poinctez les vns contre les autres. Les anciennes querelles des maisons, qui auoient esté pour quelque temps assoupies, commençoient à se resueiller. C'est chose veritable ce que dit Iules Cesar en ses Commentaires, Que la Gaule est toute pleine de factions. Il y en a aux champs, il y en a aux villes, aux bourgs, aux villages, aux hameaux, aux assemblees publiques, aux Courts, voire à la chambre des Roys & des Princes il n'y a compagnie où il n'y en ait, iusques aux maisons des particuliers & à leurs foyers. La multitude d'icelles les rend foibles, & peu nuisibles. Au contraire l'on en peut tirer quelques fois profit: car vn grand Estat ressemble vne vouste, qui tomberoit, si les pierres dont elle est compolee, ne s'empeschoient les vnes les autres. Mais les

discordes qui sont entre les Grands & puissans,
 entraînent ordinairement avec elles le reste de
 l'Estat. I'ay composé & appaisé tout cela, à l'ai-
 de & par le conseil de ceux que vous dictes les
 auoir nourries & fomentees. Croyez, croyez,
 mon Nepueu, que vous vous y fussiez trouué
 bien empesché: il vous eust bien fallu recourir,
 reblandir & implorer l'aide de ceux que vous
 blasmez tant maintenant. Vous ne vous en fus-
 siez sceu passer. Le conseil est vne chose sainte
 & sacree, & ceux qui le donnent aussi. Mais vous
 dictes que vous vous estes tousiours bien ap-
 perceu que ces gens là me trompoient, qu'ils a-
 uoient des desseins particuliers pour regner
 parmi la confusion. C'est autre chose. I'ay bien
 tousiours creu, que ces gens là desquels vous en-
 tendez parler, estoient hommes nourris parmy
 le monde, & qu'ils desiroient s'y conseruer: &
 qui en doute? & qui doute qu'ils ne taschent de
 s'y aggrandir, & reculer ceux qui leur sont con-
 traires? Cela a tousiours esté depuis que le mon-
 de est. Il en faudroit rebastir vn autre, si on
 vouloit oster cela: que dis-ie rebastir? mais re-
 fondre vn nouuelle nature: car cela est naturel
 à tous les hommes. En quoy toutesfois ie ne les
 veux soustenir, s'ils se sont voulus aider de
 moyens illicites, ou autres artifices perni-
 cieux à l'Estat. Si ainsi est, que ne m'en a-
 uiez-vous aduertie? Vrayement, mon Nep-
 ueu, vous vous faictes vn bel honneur, i'en
 rougis pour vous: Vous qui estes du sang
 de France, le plus genereux qui soit au monde,
 auoir supprimé si long temps la verité à vostre
 Roy, à la Roine Regente sa mere, en leur con-
 seil, où vous estiez tous les iours; la verité, dis-iz,

que le debvoir & magnanimité de vostre courage vous obligeroit de dire & reueler, voire au péril de vostre vie; puis qu'il y alloit de chose tant importante, comme vous dictes, que de l'entier bouleuement de cest Estat. Les estrangers ne croiront cela que malaisement; ou s'ils le croient, ce sera aux despens de vostre reputation. Ne croyez rien de sinistre, ô Estrangers, ny vous, ô Posterité, de mon Nepueu: car il n'entra iamais rien dans son ame braue & genereuse qui puisse tacher sa qualité. Non non, mon Nepueu, ne reiettez point toutes ces fautes, que vous pretendez auoir esté commises au maniemment des affaires, sur ceux dont vous dictes que ie suis preoccupee. Cessez de battre le chien deuant le lyon. Vous les auez toutes comptees exactement par vostre lettre: vous n'y auez rien oublié. Tout ce que vous m'obiectez, que dis-je, vous m'obiectez: à moy, non, mais au conseil du Roy, où vous auez tousiours presidé en mon absence, ce sont choses friuolles, & prouenants de la sinistre interpretation que vous y apportez. Je les ay toutes considerees, ie les recognois. C'est moy qui les ay commises, si faute y a; ce que toutes ames espurees de passion, quand on entendra comme le tout s'est passé, n'estimeront iamais. Ne vous en prenez à personne qu'à moy: ie n'ay point esté seduite: ma facilité n'a point esté circonuenue: ie n'ay rien faict que par meur conseil & deliberation, où vous auez mesmes esté present & consenti. I'ay faict du mieux que i'ay peu; encores que vous tiriez tout en mauuaile part, comme vn mauuais estomach

conuertit

conuertir toutes les plus delicates viandes en
 mauuais suc. Mais ie ne suis pas deliberee d'en
 contester avec vous d'auantage. Les conseils de
 tous les autres hommes s'arrestent à l'utile : ceux
 des Roys ne visent qu'à la grandeur & reputa-
 tion. Ce seroit trop rabaisser la Majesté du Roy.
 Monsieur mon fils, lequel ie represente, qui n'est
 tenu de rendre compte à personne de ses actions
 qu'à Dieu seul, si ie vous tenois raison de tout ce
 que j'ay manié. C'est à luy à qui Dieu a donné la
 puissance de commander. Il ne vous est resté,
 non plus qu'à tous les autres subjects, que la
 gloire d'obeyr. Et puis estimez-vous qu'il faille
 ainsi diuulguer les secrets d'un Estat? Il y a en un
 grand Estat, comme en la guerre, beaucoup de
 choses vaines, qu'il n'est pas besoin que tout le
 monde sçache; & bien souuent il se soustient
 plustost par opinion, & reputation, que par sa
 propre force. Quand on vous voit avec telle
 vehemence, qu'il n'est possible de plus grande,
 porté contre ceux qui me conseillent; ne crai-
 gnez vous point que lon vous objecte le traite
 des loups avec les brebis? N'entendez vous point
 beufre parmy la basse-cour du Loure, que
 ceux de vostre suite murmurent que ces officie's
 que vous blasmez tant, ont assez commodé
 leurs affaires, & qu'il est temps qu'ils leur quit-
 tent la place pour establir les leurs à leur tour? Je
 vous diray vne histoire. En la ville de Capoue en
 Italie les Senateurs estoient riches & puissans.
 Le peuple parenuie, qui luy est naturelle & or-
 dinaire contre telle sorte de gens, leur vouloit
 mal de mort. Pacuius estoit chef du peuple,
 homme sage & prudent, qui cognoissoit que

ces Senateurs estoient fort gens de bien, & tra-
 uaillez d'enuie : car le peuple les hayssoit, & ne
 sçauoit dire pourquoy. Vn iour, ainsi que tous
 les Senateurs estoient assemblez au Palais, Pacu-
 uius leur fist entendre la mal-vueillance du peu-
 ple, le danger de leur vie, auquel ils estoient : que
 s'ils le vouloient laisser faire, il les en garanti-
 roit. Apres qu'ils se furent resignez du tout à sa
 volonté, il les enforma dans le Palais, où ils te-
 noient le conseil; & s'en vint au peuple, & leur
 dist, que desirant auancer leurs desseins, il s'estoit
 saisi des Senateurs, & les tenoit prisonniers;
 que leurs ennemis estoient en leur puissance,
 pour en disposer comme bon leur sembleroit;
 mais qu'il ne falloit pas tant flatter ny complaire
 à son appetit de vengeance, qu'on ne regardast à
 son vtilité: Que la ville ne pouuoit demeurer
 sans conseil public, qui estoit ces Senateurs;
 que deuant que les faire mourir, il en falloit
 eslire d'autres en leur place. Le peuple trouua
 cela bon. Le lendemain le peuple fut assemble,
 pour proceder par la pluralité de voix à l'election
 des Senateurs, à mesure qu'ils les feroient
 mourir. On fit venir le premier, il fut question
 d'en eslire vn autre en son lieu: ils commen-
 cerent tous à se regarder l'vn l'autre. En fin
 il s'en trouua vn plus hardy que les autres, qui en
 nomma vn. Ils s'escrierent tous, les vns qu'ils
 ne le cognoissoient point, les autres que c'estoit
 vn meschant, qu'il auoit faict cecy, qu'il auoit
 faict cela. On vint au second, & puis au troi-
 sieme; iamais ils ne se peurent accorder d'aucun:
 tellement qu'ils descendirent en ceste resolution,
 de se tenir à ce qu'ils auoient, & que le mal le

plus cogneu estoit le moins mauuais & le plus tolerable. Tournez vostre veüe de tous costez; iettez vos yeux par tous les endroiçts de la France: vous & moy serions bien empeschez, sil nous en falloit mettre d'autres en la place de ceux que vous blasmez tant. La France est plus desgarnie, est plus sterile de telle sorte de gens, c'est à dire, de conseil, & entendus en l'Estat, qu'elle ne fut iamais. Quant à ce que vous vous plaignez de ce que i'ay eu volonté d'arrester les Ducs de Boüillon & de Longueuille, & que i'ay donné gardes au Duc de Vendosme; vous vous plaignez bien à tort & de saine teste. Enquerez vous des Theologiens & Iureconsultes, voire de vous-mesmes, ce que les loix diuines & humaines permettent de faire de ceux qui sont trouuez en dessein de s'assembler, pour meller leurs deliberations contre le repos de leur pays: & vous serez certainement esclairey, qu'il y a plus de sujet de m'accuser de trop de douceur que de rigueur, qui ay bouché les yeux à ce que ie voyois deuant moy, & faict semblant de ne le point voir, sous esperance, en laquelle ie suis encores, que vous retourneriez tous à de plus sains & sages conseils. La fortune fournit aux Roys & aux Princes, dès qu'ils naissent en ce monde, toutes autres choses à souhait & abondance: vne seule leur defect, à l'acquisition de laquelle ils doiuent assiduelement s'employer & trauailler, & en estre insatiables; la bonne reputation & heureuse memoire de leur nom. Que dira l'Italie, que dira l'Allemagne, que dira l'Angleterre, que dira l'Espagne, que diront tous les estrangers, que dira la posterité, quand ils liront

vostre lettre, que pour des causes si frivoles vous auez (Dieu destourne ce malheur de vostre teste, & de celle des François) vous auez, dis-je, mon Nepueu, rompu la paix de vostre pays, Paix vniuersellement embrassée & gardée par tous les gens de bien, & telle que quand les affaires iroient pis mille fois que vous ne dictes, la condition en seroit encor plus tolerable, que d'une guerre ciuile ? Que diront-ils, de ce que vous auez abandonné, pour des opinions erronees, qu'on vous a mises en l'esprit, vostre Roy, lors qu'il auoit plus de besoin de vostre conduite & addressée, qu'il estoit prest de passer à majorité, au passage de laquelle il suruiuent ordinairement diuers mouuemens à la ieunesse, dignes du soing, assistance & vigilance des plus proches, fidelles, & speciaux parens & seruiteurs, comme vous estes ? Mais sur tout que vous diroit vostre pays, s'il pouuoit parler ? Il vous diroit que vous prinsiez exemple sur ceux qui ont faict cy-deuât semblables entreprises, & sur ce qui leur en est aduenü. Exemple qu'il ne vous faut point aller chercher bien loin : car il est chez-vous. Que voulez-vous faire ? voulez-vous porter force & violence à vostre pays ? voulez-vous leuer l'enseigne & faire party d'impunité d'oppressé, vexation & saccagemens d'hommes & de biens ? violement de femmes & de filles ? & de toutes les miseres que les guerres ciuiles, dont nous ne faisons que sortir, ameinent avecques soy ? Voulez-vous remplir vostre pays, de sang, de meurtres, de carnage & de desolation ? Voulez-vous fourrer le couteau dans le ventre de vostre patrie vostre

mere? Ce ieune Prince semble s'esmouuoir; ie ne le veux pas presser d'auantage. Vous estes, mon Nepueu, du sang de France; sang que toute la Chrestienté, voire tout le monde honore, spécialement ceux de ma maison. Escoutez ce que ie vous diray. Le Roy Charles VII. ayant reconquis le Royaume sur les Anglois par la valeur & proüesse de sa noblesse, estoit tout possédé par elle, dont les principaux estoient officiers, que vous appelez, de la Couronne, qui le tenoient en subiection. Loys XI. son fils luy succeda, qui ne cognoissoit point ces gens là, & n'en tenoit compte, faisoit les affaires sans les y appeller, & sans prendre leur aduis. Il tenoit l'ancienne maxime du Royaume, que les armes & la force deuoient estre par deuers la noblesse, pour en vser là où, & comme elle seroit par luy commandee, sans qu'elle se messast d'autre chose: tout l'ordre, toute l'administration de la police, de la iustice, le maniement des richesses publiques, tout le conseil, par deuers l'Eglise & le tiers Estat: Pource que la force destituee de conseil ne peut rien; & le conseil sans execution, qui ne peut estre sans la force, demeure vain, inutile & sans effect. Eux qui auoient esté en grande autorité, & qui se persuadoient qu'estants officiers de la Couronne, (ce mot est specieux & emplit la bouche) ceste autorité leur apartencoit de leur droit, se facherent se voyans desdaignez. Le Comte de Charolois) son pere le bon Duc de Bourgongne Philippe, qui mit les Anglois en France, & les en fit sortir, viuoit encores) touché de quelque ressentiment d'ingratitude, & offensé du Roy,

qui auoit esté honorablement receu & entrete-
 nu en sa maison, pendant la disgrace de son pere:
 les Ducs d'Aquitaine, frere, & de Bretagne, vaf-
 sal de sa Majesté, ioignirent leur mescontente-
 ment avec celuy des autres nobles & officiers de
 la Couronne, & leuerent la guerre, qu'on appel-
 le du mesme nom que celle que vous voulez es-
 mouuoir, du Bien public. Ceste esmeute vint
 iusques là, qu'ils liurerent bataille au Roy, que
 lon appelle la Bataille de Montlehery. Apres ce-
 ste bataille le Comte de Charolois estoit en vne
 fenestre de son logement, & le Duc d'Aquitaine
 avec luy, en la compagnie de plusieurs autres tant
 Seigneurs que Gentils-hommes. L'Aquitanois
 frere du Roy voyant passer tant de corps morts,
 tant de blessez, de pitié qu'il en eut, les larmes luy
 vindrent aux yeux, s'escriant, qu'il estoit bien
 miserable d'estre cause d'une si grande effusion
 de sang. Le sens des yeux est plus croyable &
 plus sensible que celuy des oreilles. N'attendez
 pas, mon Nepueu, que l'object arrache ceste pi-
 tié de vous: preueniez-la: rendez la paix assuree
 par l'obeyssance deuë par vn bon sujet & parent
 à son Roy. Venez; venez, mon Nepueu, venez
 vous reioindre au corps de l'Estat, duquel apres
 le chef vous estes le second membre. Quittez ces
 precipitez & deplorables conseils. Le commen-
 cement en est ordinairement agreable, la proce-
 dure fascheuse, l'euenemēt triste. Vostre loüan-
 ge est assise en lieu haut & eminent: elle est esclai-
 ree de tout le monde. Toute la France iette les
 yeux dessus, toute l'Europe la regarde. Faiçtes
 choses dignes & qui respondent à ceste attente.
 Gardez vous de la souiller d'aucun sinistre depor-

tement. Ceux qui sont nais pour auoir vn grand nom, comme vous, ou bon ou mauuais, doiuent bien prendre garde à foy. Venez reuoir vostre Roy, venez vous ietter à ses pieds, rapportez-luy la paix que vous auez emportee. Venez sacrifier à vostre pais vostre vie que vous luy deuez. N'appellez pas au conseil de vos pensees, ny le despit procedant de desdaing & mespris, (car ceux d'où vous croyez qu'il procede n'y oseroient auoir pensè, & ne sont pas dignes de vostre cholere;) ny la deffiance, car quel subject auez vous d'en venir là? Ie vous desire, ie vous estime, ie vous ay cher, & le Roy Monsieur mon fils pareillement. Vous ne nous auez iamais donné occasion de faire le contraire. Le Comte de Champagne braue & vaillant Prince & les Seigneurs de France eurent despit de ce que le Roy S. Loys, d'où vostre illustre maison est descendüe, mineur & en bas aage, estoit en la tutelle de sa mere, & qu'elle estoit Regente, qui gouuernoit sans les faire participans du gouuernement. C'est vne ialousie qui n'est pas d'aujourd'huy. Ils s'assemblerët & pourfuinirent le ieune Roy, pour s'en saisir, depuis Montlehery iusques à Paris: les Parisiens vindrët à la rescousse, qui le remenerent à sauueté dedans leur ville. Cela n'empescha pas qu'ils ne fussent depuis bons amis, qu'il ne se fiast au Roy, & le Roy à luy. Ce petit mescontentement que vous auez pris, sera vn plus ferme renouïement de l'obeyssance & seruice, dont Dieu & nature oblige enuers sa Majesté. Apres son frere vous estes son seul soustien, vous estes son seul support, son esperance, & celle de toute la France. Ne gastez point tant de belle monstre que

Dieu a faict pouſſer en voſtre perſonne, par quelque triſte gelee, ou pluſtoſt par quelque chaleur inconfideree & precipitee. Gaignons, gaignons le port, mon Nepueu. Toutes choſes ſont entieres. Le Roy eſt tantotſt maieur: il luy faut bailler le gouuernement & de ſa perſonne, & de ſon bien, non bleſſe, non intereſſe, ſon bien pacifique & non trouble. C'eſt à ceſte heure qu'il faut tenir les Eſtats, c'eſt le temps opportun. Voſtre requeſte eſt tres-juſte, voſtre intention tres-loiiable. Il ne falloir pas pour cela ſonner l'alarme par toute la France, eſmouuoir les peuples; il ne falloir pas abandonner le timon, il ne falloir pas quitter le Roy. Monsieur mon fils; il ne falloir pas, quelques-cinq ou ſix Princes que vous eſtes, aſſocier vos conſeils & meſcontentemens particuliers pour rompre la paix vniuerſelle de toute la France, voire de toute la Chreſtiente. Tenons, tenons ces Eſtats, mon Nepueu. Là ie iureray hardiment, & feray ſerment deuant Dieu, deuant tous les François, deuant tous les Princes Chreſtiens, deuant toute l'Europe, non pas tel que Ciceron, homme vain, fit deuant le peuple Romain, ſortant de ſon Conſulat, qu'il auoit ſauuë la Republique. mais que i'ay entretenu & conſeruë la paix: en la conſeruation de laquelle, ſi le ſalut du Royaume coſiſtoit ou non, ie le laiſſe à iuger à vn chacun. I'ay achepté ceſte paix à quelque prix que ce fuſt. Toutes mes prodigalitez, que vous me reprochez tant, ſont allees là: qu'on diſe tout ce que lon voudra. Si la malignité de ce ſiecle m'enuie ce los, ce ſera ingratitude: & l'eſperance me coſole que la poſterité en ingera tout autrement. Il me ſouuient de ce que l'Em-

pereur

pereur Iulian reproche à l'Empereur Alexandre
 Seuere, qu'il auoit mieux aimé bailler ses richesses
 à sa mere, femme auare, pour en thesauriser, que
 les departir à ses amis, d'où vint la ruine de son
 fils. Je n'en ay pas faict de mesme: ie n'en ay
 pas faict mon profit, ie n'en suis pas enrichie.
 Quand ie n'aurois point esté femme d'un grand
 & puissant Roy, comme i'ay esté, Dieu m'a faict
 naistre d'une maison assez grande, riche & ma-
 gnifique, pour m'en passer. L'or non pas de la
 France, mais de tout le monde, est moindre que
 mon courage. Si parmy si grande quantité de
 grain, que i'ay semé pour moissonner la paix, il
 y en a quelqu'un qui est mal escheu, qui a esté
 perdu, qui a esté gasté, qui a esté follement des-
 pendu, le reste n'a pas laissé d'estre publiquement
 vtile. Mes liberalitez n'ont point ressemblé les
 figures, qui naissent és hautes montagnes & pre-
 cipices, qu'il n'y a que les milans, vaultours, cor-
 beaux, & autres oyseaux de proye, qui en puissent
 approcher, & qui les mangent. Ma beneficence a
 esté respendue par tout, pour le bien de l'vniuer-
 selle tranquillité de la France. Mais ie voy par
 vostre lettre que vous entrez en quelque doute,
 en quelque soupçon de ce que le Roy Monsieur
 mon fils arme: arme, dis-ie, comme les Roys ses
 predecesseurs ont accoustumé d'armer en plei-
 ne paix. La desffiance du sujet contre son Roy
 est desobeyssance; qui consulte s'il doibt obeyr,
 ceste consultation est rebellion. Il ne faut pas
 accoustumer les Roys à craindre leurs sujets, ny
 les sujets à se desfier de leurs Roys: c'est la disso-
 lution de la monarchie, c'est le plus grand mal-
 heur qui scauroit aduenir pour les vns & pour

les autres. Vous avez tort : mon Nepueu, vous avez tort de penser que ceste febue se forge contre vostre teste. Ces armes sont pour l'assurance des bons, & terreur des meschans, qui voudront troubler, qui voudront violer les loix & la paix publique de leur pays. Ces armes sont pour faire teste à nos voisins, qui voudroient busquer quelque fortune contre nous. Car personne ne vous en veut : & il ne faut pas que vous vous couvriez du pretexte de vostre deffense pour prendre les armes. Ce n'est pas à vous à qui Dieu a donné le droict de glaiue : c'est au Roy. Si vous le voulez vsurper sous quelque pretexte que ce soit, vous faictes chose iniuste, & ne vous en peut que mal venir. Ce n'est pas à vous de vous deffendre contre vostre Roy, à la volonté & ordonnance duquel, quelle qu'elle soit, la Loy de Dieu, ne vous permet de resister, quand mesmes il vous voudroit opprimer & courir sus : à quoy il n'a iamais pensé. Et puis il faut reformer l'Estat. Se fit-il iamais reformation sans armes ? & qui doit auoir ces armes, que le Souuerain magistrat, sous la protection duquel tous les subjects vivent ? Sa vigilance fait le guet pendant qu'ils dorment, son trauail deffend leur repos, son industrie leur aise, son occupation le loisir de tous. Siles Estats supplient le Roy de donner les Gouuernemens à temps, s'ils remonstrent que les grandes puissances, qui ont les armes en la main, bien que sous le nom du Roy, fortifiees de bonnes villes & fortes pour retraicte, continuees des peres aux enfans, & encores esleuez en de grandes charges & dignitez hereditaires affoiblissant l'estat monarchique, comment y

pourra-il donner ordre & reglement, & l'ex-
 ecuter sans force? C'est la verité que les Princes &
 Seigneurs, à qui aujourd'huy ces honneurs sont
 departis, & ceste genereuse noblesse Françoisse,
 aimeroit mieux mourir, que de souffrir aucu-
 ne diminution de la majesté de l'estat Royal.
 Le souffririez-vous, ô noblesse Françoisse, qui
 avez tant prisé & honoré ce grand Henry son
 pere? voudriez-vous endurer que le fils fust re-
 duiet en ordre? le fils, la race de tant de Roys?
 Mais les temps & les humeurs changent, & le
 present n'est pas bien souuent pleige assure &
 caution soluable de l'aduenir, ny les peres des
 enfans. Vous y avez interest, mon Nepueu,
 plus que pas vn de ceux qui sont avecques vous:
 lesquels, quoy que vous disiez, ne sont nulle-
 ment interessez à la foiblesse de la Royauté,
 ains par icelle croissent & s'autorisent: car
 autant qu'ils en ostent au Roy, autant il leur
 en accroist. Tout ainsi que le corps humain
 qui est composé de quatre humeurs, s'il y en a
 quelqu'vne qui abonde plus que les autres, est
 malade & indisposé: ainsi quand quelqu'vn des
 Estats, qui font le corps de quelque Royaume
 ou republique, deuient de beaucoup plus fort
 & plus puissant que les autres, il y a danger de
 subuersion & changement. Mais l'excez de la
 part de la Noblesse est plus dangereux que nul
 autre. Vous parlez aussi de l'Eglise, & vous
 plaiguez de ce que les Ecclesiastiques n'ont
 point rang honorable au conseil du Roy. Quand
 est-ce qu'ils en ont eu autre que celuy qu'ils ont?
 C'en'est pas là, ce n'est pas là où ils se doiuent
 aimer. On n'y parle que d'euocation, de leues

de deniers, d'imposts, de tailles, de gabelles, de partis, de douane, de fermes, d'aides, & autre mesnagerie, à laquelle la nécessité nous a aiguillé l'esprit, & peut-estre trop. Qu'a de commun l'Euangile & les saints Peres, qu'a de commun l'Euesque avecque tout cela? Les Euesques n'ont-ils pas de toute ancienneté leur rang & seance aux Parlemens? rangs qui sont les vrais, anciens & legitimes rangs du Royaume, dont ils se doivent contenter: car ceux du Conseil sont nouveaux, extraordinaires, & qui ne valent que là. Les Roys font valoir les hommes, comme des jettons, à leur volonté. Les rangs des Loix sont stables, immobiles, ordinaires, & qui ne changent point. Les Canons defendent aux Ecclesiastiques de se mesler des negoces seculiers. Toutes les loix & reformatiions qui ont esté en la Chreienté, les obligent à résider aux lieux de leurs charges. Là ils dorment paistre leurs ouailles, instruire les peuples en la vraye doctrine de Christ, les edifier par predications & bonnes œuures, avoir soing des pauvres, consoler les affligez, estre soigneux de l'institution de la jeunesse, & exercer les œuures de charité, qui leur est tant recommandée, & à toutes personnes par les saintes lettres. Ce n'est pas à la suite des Roys, ce n'est pas à la Cour où s'apprend l'exercice de ceste charité, où s'apprend la vertu, où s'apprend la pieté, où s'apprend la probité, où s'apprend le mespris des honneurs mondaines, où s'apprend la douceur, la modestie, la continence: ce n'est pas l'eschole où les saintes lettres, ny les autres s'enseignent. Il faut, il faut que chaque Euesque reside en son diocese, & qu'il ne vague point tantost

çà tantost là : qu'il embrasse d'une amour vraye-
 ment paternelle le troupeau, dont la garde luy a
 esté commise. Il me souvient à ce propos de ce
 bon Euesque de Verdun, nommé Desiré ou
 Didier : il estoit riche de son patrimoine ; mais le
 Roy Theodoric, vn de vos Roys de la premiere
 race, l'en auoit spolié. Les habitans de Verdun
 ayans esté longuement affligez de peste & de fa-
 mine, estoient reduicts à vne extreme pauvreté.
 Ce bon Euesque estoit aymé d'un autre de vos
 Roys, nommé Theodebert, de la mesme race :
 duquel il emprunta à interest sept mille escus,
 lesquels il distribua à ces pauvres habitans, qui se
 voyant de l'argent deuant eux, s'employèrent au
 traffic & à la marchandise : de maniere qu'en peu
 de temps ils se releuerent de leur pauvreté, & de-
 uindrent aisez & commodés. Vous dictes aussi,
 qu'il n'y a plus d'Euesques ; ausquels on com-
 mette des ambassades. Ha ! mon Nepueu, mon
 Nepueu, ce n'est pas à eux ny autres personnes
 de religion d'estre enuoyez en ambassade aux
 Princes seculiers, si ce n'est comme les mede-
 cins aux malades : mais d'enuoyer ambassades
 de leur part, là haut au Ciel, leurs souspirs, leurs
 gemissemens, leurs larmes, leurs penitences, leurs
 ieusnes, leurs aumosnes, leurs prieres, leurs orai-
 sons, pour impetrer pardon des pechez des
 peuples, pour appaiser l'ire de Dieu ; qui est bien
 enflammee contre nous tous, spécialement con-
 tre toute la France. Les Roys & Potentats nos
 voisins nous en enuoyent bien de ceste qualité.
 Nommez m'en vn, ie vous prie ? Vous avez
 bien enuie de quereller, & vous ne sçavez trou-
 uer sur quoy. Car quant aux mariages d'Espa-

gne, toutes choses sont encores entieres, & dependent de la volonté du Roy Monsieur mon fils, quand il iouyra de ses droicts, quand il sera en aage, ce sera à luy d'en faire & disposer comme bon luy semblera. Ce que i'en ay faict, ie l'ay faict pensant bien faire. Sur la fin de vostre lettre vous parlez du tiers Estat, sous lequel la Iustice est comprise. Y a-il rien en tout le corps du Royaume si depraué & si corrompu, & où il y ait plus à reformer? car la Iustice est l'ame donnant vie & estre à toute société, & à toutes assemblees legitimes d'hommes respirans & viuans en mesmes loix, mœurs & religion, sous vn mesme Prince, ou autre espece de gouvernement. O que la France auroit bon besoin d'un Aratus qui trouuaist vn Ptolomee, pour rembourser tant d'Officiers inutiles, qui ont esté creez depuis cinquante ans en ça, qui mangent le Roy & le peuple! Que dis-je, d'un Aratus & d'un Ptolomee? mais d'un Hercule Gaulois, pour combattre ces deux execrables monstres, les pestes non seulement de la Iustice, mais aussi de tous Estats, l'Ambition & l'Auarice: que la plus part de vos loix & ordonnances tres pernicieuses fauorisent, & le public en tire profit. Cet Hercule fera, s'il plaist à Dieu, le Roy Monsieur mon fils, qui en sa plus tendre ieunesse à tousiours montré & monstre de plus en plus, que Dieu a versé à pleines mains sa benediction sur sa teste, haïssant le vice & aimant le bien. Le Roy, fils de ce grand HENRY, le Roy Monsieur mon fils, dans l'ame duquel on voit à veüe d'œil bouter & fleurir d'heure en heure l'amour de la pieté, de la iustice, avec vn zele & ardeur incroyable de reestabliir la religion, la paix, le repos, la foy, l'or-

dre & la droicteure. Croissez, ô ma chere teste!
croissez, ô mon cher fils! croissez, ô mon Roy!
& avec vous croissent aussi les belles parties qui
poussent en vous. Mais ie passe les bornes d'une
simple lettre: la vostre, mon Nepueu, m'a em-
portee iusques là: & me conuie encores pour la
fin, faire à Dieu, de tres-grande affection, la prie-
re du Prophete Ieremie,

*Costeau trenchant de Dieu; rentre dedans ta guaine.
Refroidis-toy, sois coy, & plus ne te demeine.
Pense sur nous, bon Dieu, des pensees de paix,
Et nous inuokerons ton Nom saint à iamais.*

FIN.

1. The first of these is the fact that the
theology of the church is not a static
entity, but a living and growing
entity, which is constantly being
renewed and transformed by the
work of the Holy Spirit in the
lives of the faithful. This is the
essence of the Christian faith, and
it is the basis of all Christian
teaching and practice.

2. The second of these is the fact that
theology is not a purely academic
discipline, but a discipline which
is deeply rooted in the life of the
church. It is a discipline which
is constantly being shaped and
renewed by the life of the church,
and it is the life of the church
which is the source of all Christian
teaching and practice.

1. The first of these is the fact that